

## A B A T A L L A D O I N C I O

Lema: M. Randulfe

Na terra irmá do Caurel,  
nos torreóns isolados  
do castelo de Carbedo,  
o Príncipe asturiano  
recibe a nova da morte  
do usurpador Mauregato  
e o varil fillo de Fruela  
retorna aos seus lares patrios;  
que a viuda reina Adosinda  
anceia velo coroado  
e o rei Bermudo Primeiro  
trocóu xa os talares hábitos  
por armaduras guerreiras,  
lanzas, ielmos e vasallos  
pra desinzar os camiños  
do futuro rei dos cántabros.

Compangando artes de guerra  
co estudo de libros sagros  
enclaustróuse Alfonso en Mieres  
durante doux longos anos  
e cando o pío Bermudo,  
cumpridos os seus degaros,  
rebordante de ledicia  
volve ao retiro monástico,

.../...

os combatentes afoutos  
e o nobre pobo cantábrico  
aclaman ao novo rei  
Alfonso Segundo o Casto,  
que vence ao Abd-ar-Rahmán  
e, sen vagar nen descanso,  
avanza na reconquista  
dos territorios cristianos.

Tras da batalla de Oviedo  
as hostes do Califato  
son derrotadas en Lutos  
polo guerreiro soberano  
que chega a terras luguesas  
e, na Catedral postrado,  
implora a Deus que abenzóe  
aos destemidos galaicos.

Nas vizosas veigas do Incio,  
nos picoutos de alabastro,  
acarón das fontes férreas,  
nos más extremos recantos,  
os fonchos fillos de Mahoma  
queiman, matan, fan estrago.

- A media Lúa en Moroso,  
na veiga o Sino Cristiano;  
as choias arrevoaban  
agoirando malos fados --

Oitocentos vintetres .....

Na sua atalaia, ufanos,  
Mahumud e os sarracenos  
coidánse fortes e a salvo;

.../...

pero as mesnadas de Alfonso  
non temen pragas nem raios  
e encetan a dura loita  
contra o invasor mahometano.

Enxurrada de guerreiros,  
troupeleo de cabalos,  
os anxeicosos galaicos,  
valentes e afervoados,  
baten con lanzas de ferro  
nos infieles africanos.  
Inzase o ceo de frechas  
e as espadas de milagro,  
forxadas na Ferreiría,  
tínguese de sangue islámico  
sementando de cadavres  
a fortaleza do Castro.

Na Pena dos Cabaleiros  
e no mosteiro de Samos,  
nas serras outas e bravas,  
nas devesas e nos agros,  
nas veigas do río Cabe  
e nas vagoadas do Mao  
ecóan os aturuxos  
dos victoriosos cristianos.

Namentras, o rei Alfonso,  
cos abades e vasallos,  
reza unha oración de gracias  
ao Apóstol Señor Sant-Iago.

---

.....